

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 11. Zakona o finansiranju institucija Bosne i Hercegovine ("Službeni glasnik BiH", br. 61/04 i 49/09), Vijeće ministara Bosne i Hercegovine, na 5. sjednici održanoj 30.marta 2012.godine, donijelo je

ODLUKU
O PRIVREMENOM FINANSIRANJU INSTITUCIJA BOSNE I HERCEGOVINE I
MEĐUNARODNIH OBAVEZA BOSNE I HERCEGOVINE ZA PERIOD
APRIL-JUNI 2012. GODINE

Član 1.
(Predmet odluke)

Ovom odlukom odobrava se privremeno finansiranje institucija Bosne i Hercegovine i međunarodnih obaveza Bosne i Hercegovine za period april-juni 2012. godine.

Član 2.
(Visina sredstava za privremeno finansiranje)

- (1) Privremeno finansiranje institucija Bosne i Hercegovine i međunarodnih obaveza Bosne i Hercegovine za period iz člana 1. ove odluke utvrđuje se na osnovu iznosa ukupno usvojenih sredstava Zakona o budžetu institucija Bosne i Hercegovine i međunarodnih obaveza Bosne i Hercegovine za 2011. godinu („Službeni glasnik BiH“, broj 12/12).
- (2) Za finansiranje institucija Bosne i Hercegovine utvrđuje se iznos od 226.250.000,00KM, što predstavlja $\frac{1}{4}$ sredstava za finansiranje institucija Bosne i Hercegovine utvrđenih u Budžetu institucija Bosne i Hercegovine i međunarodnih obaveza Bosne i Hercegovine za 2011. fiskalnu godinu.
- (3) Servisiranje međunarodnih obaveza u periodu april-juni 2012. godine vršiće se na nivou stvarno dospjelih kreditnih obaveza koje proističu iz međunarodnih ratifikovanih ugovora.

Član 3.
(Raspored prihoda po budžetskim korisnicima i vrstama rashoda)

- (1) Raspored prihoda po budžetskim korisnicima za period iz člana 1. ove odluke vršiće se na nivou jedne četvrtine ukupnih sredstava u usvojenom budžetu za 2011. fiskalnu godinu, uključujući direktne transfere i rezervisanja iz člana 3. tabele 3. (stavke 99991 i 99992).
- (2) Korištenje rezervi iz stava (1) ovog člana vršiće se u skladu sa članom 13. Zakona o budžetu institucija Bosne i Hercegovine i međunarodnih obaveza Bosne i Hercegovine za 2011.godinu.
- (3) Budžetski korisnici ne mogu započeti kapitalna ulaganja, nove ili proširene programe i aktivnosti dok se isti ne odobre u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2012. godinu.
- (4) Za institucije formirane tokom 2010. i 2011. godine, operativne mjesečne budžete odobrava Ministarstvo finansija i trezora polazeći od odobrenih sredstava u Budžetu institucija Bosne i Hercegovine i međunarodnih obaveza Bosne i Hercegovine za 2011. godinu, na način da se potrebna sredstva utvrđuju prema stvarnim rashodima za četvrti kvartal 2011. godine, odnosno mjesečnom operativnom budžetu za decembar 2011. godine, uvećano za mjesečne plate i naknade novozaposlenih u 2012. godini. Tako utvrđeni mjesečni operativni budžeti za navedene institucije ne mogu rezultirati probijanjem ukupno utvrđenog okvira rashoda utvrđenog u članu 2. stav (2) ove odluke.

Član 4.
(Višegodišnji projekti)

Nastavak finansiranja višegodišnjih projekata koji su usvojeni u budžetima prethodnih godina, a za koje se sredstva prenose u skladu s članom 14. Zakona o finansiranju institucija Bosne i Hercegovine ("Službeni glasnik BiH", br. 61/04 i 49/09) vršiće se u skladu s redoslijedom prioriteta propisanih članom 18. Zakona o finansiranju institucija Bosne i Hercegovine.

Član 5.
(Servisiranje vanjskog duga)

Izmirenje obaveza na osnovu servisiranja vanjskog duga vršiće se plaćanjem obaveza iz obezbijedenih sredstava sa namjenskih podračuna u Centralnoj banci Bosne i Hercegovine, a u skladu sa planovima otplate prema rokovima dospjeća obaveza u periodu april – juni 2012. godine.

Član 6.
(Provođenje odluke)

- (1) Provođenje ove odluke vršiće se u skladu s odredbama i procedurama utvrđenim u Zakonu o budžetu institucija Bosne i Hercegovine i međunarodnih obaveza Bosne i Hercegovine za 2011. godinu.
- (2) U periodu privremenog finansiranja iz člana 1. ove odluke, prioriteti plaćanja utvrđeni su članom 18. Zakona o finansiranju institucija Bosne i Hercegovine.

Član 7.
(Stupanje na snagu)

Ova odluka stupa na snagu danom donošenja i objavljuje se u "Službenom glasniku BiH", a primjenjivaće se od 1. aprila 2012. godine.

VM broj 28/12
30.marta 2012. godine
S a r a j e v o

Predsjedavajući
Vijeća ministara BiH
Vjekoslav Bevanda